

# Nov vestgì per la «catedrala» da glatsch

Tavau: Sanaziun da l'Arena da glatsch «Vaillant»

DA GION NUTEGN STGIER / ANR

■ Il pli tard la primavaira 2018 è previs da cumenzar cun la sanaziun da l'arena. Ella na correspunda betg pli a las disposiziuns da la polizia da feu e da l'assicuranza d'edifizis. Quai è la raschun principala che la vischnanca da Tavau investescha passa 20 milliuns francs per la sanaziun da la «catedrala» da glatsch. El saja surstà dal grond interess da las medias, ha ditg *Tarzisius Caviezel*, il landamma da Tavau, en ses pled da bainvegni ier a chaschun da la preschentaiziun dal project da sanaziun da l'Arena da glatsch «Vaillant». L'interess saja segir er d'attribuir al HCD che saja adina in magnet e quai er sur il cunfin grischun. Il president da la vischnanca da Tavau ed anteriur president dal HCD ha ditg che l'Arena da glatsch «Vaillant» saja segir la pli bella halla da glatsch en l'Europa, ella saja uschè singulara ch'ella vegnia savens er cumparegliada cun ina catedrala. Per porscher vinavant in dachasa al HCD, als numerus fans, per la segirtad da giugaders ed aspectaturs e cunzunt er per il renum saja ina sanaziun da l'object necessaria, ha punctuà Caviezel.

## Novas gardarobas e duschas

Il 1979 è l'Arena da glatsch «Vaillant» vegnida construïda ed avant 11 onns è la tribuna en direcziun nord vegnida sanada e fatga da nov. Las fatschadas da l'object, l'intern da la halla da glatsch, gardarobas, duschas e tualettas èn oz na pli las pli modernas e correspundan er betg



Tarzisius Caviezel, il landamma da Tavau, ha preschentà ier il project da sanaziun da l'Arena da glatsch «Vaillant».

MAD

pli a las pretaisas da las equipas naziunales ed internaziunales che sa ferman a Tavau. Er quels aspects èn stads decisivs che la vischnanca da Tavau ha en collavuraiziun cun il HCD mess en via ina sanaziun parziala da l'Arena da glatsch «Vaillant».

**11 architects han inoltrà lur project** *Cornelia Deragisch*, l'architecta da la vischnanca da Tavau, ha ditg che 11 architects hajan inoltrà lur projects per sanar l'arena da glatsch. A la fin sajan lura restads quatter projects e da quels quatter projects haja la giuria la fin finala decidi

per il project da *Daniele Marques* dal biro d'architettura Marques SA da Lucerna. Ils architects hajan retschet intginas ordinaziuns, saja quai che pertutga ils custs cun ina directiva da 20 milliuns francs, in auter aspect saja stà da na disfar l'identitad dal bajetg e da mantegnair

ses caracter singular ed architectonic, ha ditg Deragisch.

## Damain plazs da star en pe

Il project da l'architect Marques da Lucerna è cunquai il project victur er cun avair ademplì bunamain tut ils criteris e las pretaisas da la vischnanca da Tavau sco possessura da l'Arena da glatsch «Vaillant» sco er da la polizia da feu e l'assicuranza d'edifizis. Gia en la fasa iniciala dal project da sanaziun saja er vegnida integrada ina persona da la protecciun cunter incendis, ha ditg Deragisch. *Marc Gianola*, il mainagestiun dal HCD, è cuntent che la giuria ha decidì a favur dal project dal biro d'architettura Marques SA. Il club gaja a pêr cun l'idea da Marques e ses collavuraturs.

## Damain plazs da star en pe

Er suenter la sanaziun parziala vegn l'Arena da glatsch «Vaillant» a porscher plaz a 6800 aspectaturs. Da nov vegn ella ad avair be 1800 plazs da star en pe enstagl 3400. Persuenter stattan a disposiziun supplementar 1600 plazs da seser. Ina pli gronda surfatscha survegn er la gastronomia e da nov èsi pussaivel da mintga sector da la halla da glatsch dad avair access tar il manaschi da gastronomia. En bunamain otg mais vegn il cussegl pitschen da Tavau a decider per ubain cunter quel project ed en il decurs da la stad 2017 duai il suveran da Tavau deliberar il credit per quella sanaziun parziala. Las lavurs duajan succeder en quatter etappas e da cumenzar cun quellas è previs la primavaira 2018. Il 2021 a chaschun da l'anniversari da 100 onns dal HCD duajan las lavurs esser a fin.